



L'onn passà ha la Viafier retica transportà stgars diesch milliuns passagiers e cun quai en il vair senn glied sco furmiclas.

FOTO G. N. STGIER

Glied sco furmiclas

Bun onn da gestiun per la Viafier retica

DA GION NUTEGN STGIER / ANR

■ **Betg gist diesch milliuns personas ha la Viafier retica manà dad in lieu en l'auter l'onn passà. Quai saja in svilup plaschavel, ha ditg Stefan Engler, il president dal cussegl d'administraziun, ier envers ils represchentants da las medias. Pi difficila saja dentant la situaziun tar il traffic da rauba.** La Viafier retica scriva sco l'onn precedent er il 2013 cifras nairas. Quel fatg positiv è vegnì preschentà ier a Cuira per la publicità. En cumparaziun cun l'onn 2012 ha il manaschi già cun 345 116 milliuns francs in considerabel augment tar la summa d'entradas. L'onn da gestiun 2012 aveva la Viafier retica scrit entradas da 336 256 milliuns francs en ses quint annual. Sa resultà è lura il davos onn da manaschi in gudogn da 261 000 francs e quai èn 106 000 francs dapli che l'onn da gestiun precedent. Danovamain han confederaziun e chantun sustegnì ferm la Viafier retica e quai cun ina summa da

162 000 milliuns francs. *Stefan Engler* ha lura er drizzà numerus plects d'engraziament vers Berna ed a la regenza grischuna. Ludà ha el dentant er ils passa 1300 emploiads da la Viafier retica che hajan er contribuì bler al resultat positiv dal davos onn da manaschi. «Noss manaschi è er in dals gronds patruns dal Grischun, cun tuttina prest 148 milliuns francs pajas», ha ditg Stefan Engler cun ina tscherza luschezza.

Daplis passagiers sin ils trajects curts

Il dumber da las personas transportadas l'onn passà è s'augmentà per stgars 3% sin in total da 9,8 milliuns. La consequenza è lura stada che tar las entradas dal traffic da personas è quel per 4,5 milliuns francs pli aut che l'onn da manaschi 2012. Daplis passagiers ha la Viafier retica cunzunt transportà sin trajects curts sco per exempel da Tusaun a Schiers/Aschera e da Razén a Cuira. Il transport dad autos è cun 468 000 autos

per 3000 autos pli aut che anc l'onn 2012. Quitads fà al cussegl d'administraziun da la Viafier retica la realità ch'il transport da martganzia è danovamain sa reducì e quai per 14%. Fatg ha qua il manaschi schizunt in deficit da 2,7 milliuns francs. Quel regress saja immediat da curreger cun far pli enconuschenta la viafier sco med da transport, gudagnar novs clients e reducir il material, ha ditg Stefan Engler. Nagin tema saja da relaschar emploiads che lavuran tar quella partiziun da la Viafier retica. Cun transportar rauba ha la Viafier retica fatg ina svieuta da passa 16 milliuns francs e quai èn dapli che dus milliuns francs damain. La summa d'investiziun 2013 è cun 192 milliuns francs ina summa da record. Investà è cunzunt vegnì en nov material e lura er per mantegniments da punts, tunnels e staziuns. Quest onn envida la Viafier retica a numerusas occurrenz per il giubileum da 125 onns e dapli da quella chattais vus sin la pagina d'inter-net: www.rhb/125-jahre.ch.